

Ni Presidente  
**Henry B. Eyring**  
Umuna a Mammagbaga iti  
Umuna a Panguluen



# Dagiti Bendision ti Apagkapullo

**T**i panggep ti Apo iti panangted kadatayo kadagiti bilin ket tapno bendisionannatayo. Kayatna nga ipaayannatayo iti biag nga agnanayon, ti kaindaklan kadagiti amin a sagutna (kitaen iti DkK 14:7). Tapno maawat ti sagut ti panagbiag iti dennana iti agnanayon a kas pamilia iti celestial a pagarian, nasken a tungpalentayo dagiti linteg iti dayta a pagarian (kitaen iti DkK 88:22).

Inikkannatayo kadagiti bilin iti daytoy a biag tapno tulongannatayo a padur-asen dayta a kabaelan. Ti linteg ti apagkapullo ti maysa kadagita a panangisagana a bilin. Ti linteg ket mangtedtayo iti Apo iti apagkapullo iti amin a natgedantayo. Simple laeng daytoy ta uray ubing ket maawatanna daytoy. Nakakitaakon kadagiti ubbing a mangyaw-awat iti bishop ti sobre ti apagkapullo a naglaon iti apagkapullo a naulloda.

Maysa kadagiti bendision a sumangbay iti panagbayad iti apagkapullo ket ti panangpapgisa iti pammati nga agtungpal uray iti nangatngato pay a linteg. Tapno makapagnaed iti celestial a pagarian, nasken a tungpalentayo ti linteg ti panagkonsagrar. Sadiay ket nasken a mariknatayo nga amintayo ken amin nga adda kadatayo ket kukua ti Dios.

Adda tallo a wagas a ti panagbayad iti sibubukel nga apagkapullo iti daytoy a biag ket mangisagana kadatayo

a *makarikna* iti nasken a mariknatayo tapno umawat iti sagut ti agnanayon a biag.

**Umuna**, no bayadantayo dagiti apagkapullotayo iti Simbaan, ibukbok ti Nailangitan nga Amatayo dagiti bendision kadatayo. Asino man nga agtultuloy iti panagbayad iti apagkapullona ket ammona a pudno daytoy. No dadduma naespirituan dagiti bendision ken no dadduma ket temporal. Maited dagitoy iti panawen ti Apo ken mayannurot iti no ania ti ammona a nasayaat para kadatayo.

Iti panagsangbay dagita a bendision, dumakdakkal ti pammatitayo a ti Dios ti pagtaudan iti amin a nasayaat iti panagbiagtayo. Agbalin a nalaklaka a kitaen a ti panagkonsagrar ket simple a makailasin ti kinapudno a ti amin a pinarsua ti Dios ket kukuana. Pagbalinennatayo a *makarikna* iti panagyaman a kidkiddawenna laeng ti 10 a porsiento iti intednan kadatayo. Ngarud, ad-adda a nakasaganatayo nga agtungpal iti linteg iti panagkonsagrar no maidawatto daytoy kadatayo.

**Maikadua**, amintayo nga agtultuloy a nagbayad iti sibubukel nga apagkapullo ket *makarikna* iti dakdakkal a panagtalek iti panagdawat iti Apo no ania ti masapultayo ken ti pamiliatayo. Inkarina dagiti bendision uray ad-adu pay ngem ti nasken a maawattayo no nagbalintayo a napudno iti katulagantayo nga agbayad

iti apagkapullotayo (kitaen iti Malakias 3:10). Ngarud, ti maysa kadagiti kaindaklan a bendision ti apagkapullo ket ti panagtalek no anianto ti masakbayan. Ania man dagiti kasasaadtayo, agbalinto a nasayaat ti amin. No tungpalentayo dagiti karitayo, tungpalenna met dagiti karina. Ti rikna ti kinatalna ket maysa kadagiti naindaklan a bendision iti panagbayad iti sibubukel nga apagkapullo. Kadagiti nagtungpal iti bilin ti apagkapullo ket makapagpaneknek a ti bendision ti kinatalna ket napaypayso ken napateg.

**Maikatlo**, dagiti agbaybayad iti apagkapullo ket *makarikna* iti dumakdakkal a panagayatda iti Dios ken iti amin nga annak ti Dios. Dayta a dakdakkal a panagayat ket sumangbay manipud iti pannakaawat no kasano nga usaren ti Ama dagiti apagkapullo nga ipapaaytayo tapno mangbendision kadagiti tao iti daytoy a lubong ken iti kinaagnanayon.

Manipud kadagiti naikkan turay wenno napusgan a katulonganna, busbosenna dagiti apagkapullo a napanuan iti panagannad. Ti agbaybayad iti apagkapullo ket tulonganna ti Apo a mangbangon kadagiti templo, a mabalin a pakailantipan dagiti familia iti agnanayon. Tumulong ti agbaybayad iti apagkapullo Kenkuana a mangipatulod iti ebanghelio kadagiti tao iti amin a lugar. Tumulong ti agbaybayad iti apagkapullo Kenkuana a mangpakired iti mabisin ken agsagsagaba iti bukodna a wagas babaen kadagiti katulonganna. Asino man kadagita a katulongan ket maibagana kadakayo no kasano a dimmakel ti panagayat gapu ta ti apagkapullo ket nausar tapno mangbendision kadagiti tao. Kasta met kadagiti napudno nga agbaybayad iti apagkapullo.

Ti pannakakun-os iti apagkapullo wenno tithing settlement ket maaramid kadagiti bulan iti masakbayan. Ikararagko ta sapay koma ta dakayo ken dagiti pamiliayo ket mangrugi itan nga agplano ken agsagana tapno maikari kadagiti bendision nga ibukbok ti Dios kadagiti amin a makaisao Kenkuana nga isuda ket agbaybayad iti sibubukel nga apagkapullo.

## PANANGISURO MANIPUD ITI DAYTOY A MENSAHE

- No dadduma ti kasayaatan a panangisuro iti masinunuo a pagbatayan ket ti panangipakita iti daytoy (kitaen iti *Teaching, No Greater Call* [1999], 164). Ibilang iti panangidawat iti maysa a miembro ti

pamilia iti panangipakitana no ania ti ibagi ti maysa nga apagkapullo. Mabalinna nga ipakita daytoy babaen iti panangilasinna iti maysa a banag manipud iti maysa a ragup ti 10 a banag. Iti panangigibus, ibilang ti panangawis iti maysa a miembro ti pamilia nga ipakitana no kasano iti panagsurat iti papel ti apagkapullo wenno tithing slip.

- “Dagiti suruanyo ket mairanud manipud iti pannakiraman ti tunggal maysa” (*Teaching, No Greater Call*, 63). Mangawis kadagiti miembro ti pamilia a mangiburay no ania ti patienda no ania ti kayat a sawen ni Presidente Eyring iti palawag a “*makarikna* iti nasken a mariknatayo tapno umawat iti sagut ti agnanayon a biag.” Ibilang ti panangilawlawag kadagiti tallo a wagas a ti panagbayad iti apagkapullo ket mangisagana kadaytoy a makarikna ti nasken a mariknatayo nga umawat kadagiti bendision ti Dios.

## AGTUTUBO

### Umdas a Kuarta

Ni Fabiano dos Santos da Silva

**N**aam-ammok dagiti misionario idi agtawenak iti 17. Iti dayta a panawen agkaduakami nga agbibig ken manongko. Pimmusay ti inami idi napalabas a tawen, ket narigat ti biagmi. Idi sinuruannak dagiti misionario, makitak a ti Simbaan ti kanayon a sapsapulek. Ngem ti impluensia dagiti gagayyemko ti nanglapped kaniak iti ipapanko iti simbaan iti tunggal Domingo.

Iti naminsan, napanak iti maysa nga aktibidad ti Simbaan iti dayta a lawas. Iti pannakakitak kadagiti amin nga agtutubo nga agkakatawa ken agay-ayam ket nangisangbay kaniak iti naindaklan a rag-o. Dagiti misionario, a kadua dagiti agtutubo, ket naaddaanda iti dayta a gundaway a nangisuro kaniak iti adalen ti ebanghelio, ket naawis unay ti riknak isu nga inked-dengko ti agpabuniag.

Ngem uray kalpasan ti panagkamengko ti Simbaan, naipasangoak kadagiti karit. Sisiak laeng ti miembro ti Simbaan iti dayta a paset ti ili ken adayo ti pagnaedanmi iti balay a pagtataripnongan wenno meetinghouse. Awanen ti ania man a banag a kayat nga aramiden kaniak dagiti saan a miembro a gagayyemko. Idi nariknak ti kinaagmaymaysa, nagkararagak ket nariknak ti ayat ti Apo.

Tunggal bulan, umawatak iti sangkabassit a bingay ti kuarta manipud iti pondo nga imbati ni nanangko. Narigat a biagen ti bagik iti kasta laeng a sangkabassit a kuarta. Ngem inkeddengko ti agbalin a managtungpal. Nagbayadak iti apagkapullo ken nagbayadak pay ti pagplete a mapan iti seminary ken kadagiti miting ti Domingo. Diak naawatan no kasano, ngem iti gibus ti bulan, natakuatak nga adda umdas a kuarta tapno maaramidko amin dagitoy.

Ammok a nabendisionannak babaen iti panagbayad iti apagkapullo. Iti panagtungpal iti daytoy a bilin ket nakatulong kaniak a maaddaan iti napigpiga pay a pammaneknek, agserbi iti mision, ken makailasin kadagiti bendision tapno mapapigsak dagiti baro a miembro a maipasasango kadagiti karit wenno pannubok.

## ANNAK

### Makapagbayadak iti Apagkapullo

**T**i panagbayad ti apagkapullo kayatna a sawen ti panangted iti 10 a porsiento ti no ania ti matgedantayo iti Apo. Mangpanunot iti tallo nga ubbing nga agduduma dagiti trabahoda. Ipapan a ti maysa ket makategged iti 40 a pisos, ti sabali ket 80 a pisos, ket ti maikatlo nga ubbing ket makategged iti 120 a pisos. Isurat no mano ti agbalin nga apagkapullo ti tunggal ubbing.

Bonus a saludsod: Asino kadagitoy nga agbaybayad iti apagkapullo ti umawat iti kaaduan a bendision? (Pamugtuan: Kitaen ti maudi a parapo ti mensahe ni Presidente Eyring.)



Pammati • Pamilia • Tulong

# Panangpapigsa kadagiti Pamilia babaen ti Temporal a Panagpannurray iti Bukod a Kabaelan

*Adalenyo daytoy a material, ken no maitutop, paglilinnawaganyo daytoy kadagiti kakabsat a babbai a sarungkaranyo. Usarenyo dagiti saludsod a mangtulong kadakayo a mangpapigsa kadagiti kakabsatyo a babbai ken mangaramid iti Relief Society nga aktibo a paset iti bukodyo a biag.*

**T**i panangpadur-as iti panagpannurray iti bukod a kabaelan—ti kabaelan a mangaywan iti bagbagitayo ken ti pamiliatayo—ket pagrebbengan ti tunggal kabsat a babai. Agbalintayo a managpannurray iti bukodtayo a kabaelan bayat ti panagsursurotayo a mangipateg iti trabahotayo, bayat iti panagsapul-tayo iti pammaregta tapno mangsarak kadagiti kasayaatan a wagas a pakaiapaantayo kadagiti bagbagitayo, ken bayat ti panagtrabahotayo a katinnulong dagiti miembro ti pamilia tapno maited dagiti kangrunaan a kasapulan.

No managpannurraytayo iti bukod a kabaellantayo, aramaten-tayo dagiti bendision ken pama-taudantayo tapno agsagana ken maliklikan dagiti parikut. Nupay kasta, ti panagpannurray iti bukod a kabaelan, ket mapatibker pay bayat ti panagkararagtayo para iti tured a mangsango nga addaan pammati kadagiti karit wenno pannubok nga awan duadua a sumangbayto. Ti panagpannurray iti bukod a kabaelan ket mangpabael pay kadatayo nga agtungpal kadagiti katulagantayo a mangaywan kadagiti sabali.

Iti Relief Society, masursurantayo kadagiti pagbatayan ken paglaingan maipapan iti panagpannurray iti

bukod a kabaelan. Masursuro dagiti kabsat a babbai maipapan iti panagbadyet, pakalag-anan iti utang, dagiti kualipikasion iti panagtrabaho, dagiti nasantuan a kasuratan ken ti ebanghelio, panangisuro iti sabali nga agbasa ken agsursuro, teknolohia, salun-at ti bagi, kinapigsa, pananglapped ken pannakapaimbag iti adiksion, salun-at iti pannakilangen ken panagrikna, pananglapped iti sakit, panagmula, panangpaadda ken panagidulin iti taraon, panagsagana kadagiti saan a mapakpakadaan a pasamak, ken adu pay a sabali a banag a makatulong kadatayo tapno agbalintayo a managpannurray iti bukodtayo a kabaelan.<sup>1</sup>

Julie B. Beck, Relief Society general president, ket inlawlawagna a “ti panangipaay iti kasapulan ti bagitayo ken dagiti sabali ket pakakitaan a datayo ket disipulo ti Apo Jesucristo. . . . Idi kellaat a pimmusay [ti katugangak a babai] idi napan a tawen, nangibati iti pakakitaan maipanggep iti panagpannurrayna iti bukodna a kabaelan. Addaan isuna iti agdama a rekomenda iti templo ken kanayon a maus-usar a nasantuan a kasuratan ken dagiti pagbasaan iti panagadal iti ebanghelio. Siaayatkami a nangbingay kadagiti kaldero, paryok, ken platplato a nangisaganaanna iti rinibribu a

pannangan. Imbatiannakami kadagiti kobrekama nga inaramidna manipud iti daan a lupot. Namati isuna iti daan a pagsasao nga “Usarem daytoy, aruatem daytoy, pagbalinem daytoy, wenno aramidem uray awan. Naki-tami dagiti abasto ti taraon a pinatubona, tinaginayon, ken indulinna. Ti ad-adda a makawis unay iti rikna ket ti bassit a libro a pagkuentaanna a napudno unay a nakaisuratan dagiti gastosenna iti nasurok nga adun a tawen. Gapu ta nagbiag a nasalimetmet, nangibati iti sumagmano a kuarta a naurnongna para kadagiti di mapakpakadaan a pasamak, ken awan ti imbatina nga utang! Kangrunaanna unay, insuro ken pinaregtana ti adu a dadduma pay kadagiti paglaingan a nasursurona bayat ti napudno a panagbiagna.”<sup>2</sup>

## ***Manipud kadagiti Nasantuan a Kasuratan***

Juan 13:34–35; Santiago 1:27; Mosiah 4:26; Doktrina ken Katulagan 29:34–35; 38:30; 44:6

## ***Manipud iti Pakasaritaantayo***

Kanayon a makiramraman dagiti kabsat a babbai iti Relief Society iti aramid a naindagaan ken naespirituan a panangispal kadagiti kararua. Tunggal lawas bayat ti panagtataripnong

kas Female Relief Society ti Nauvoo, inreport dagiti kabsat a babbai dagiti tao nga agkasapulan. Dagiti abuloy a kuarta, tagikua, talento, ken panawen ket naited tapno mapalag-anan dagiti agkasapulan. Daytoy a naipundasion nga aramid iti panangpalag-an iti sagabaen ket nagtultuloy nga aramid ti Relief Society agingga kadagiti kaputotan.

Idi dimteng dagiti Santo iti Salt Lake Valley, ni Presidente Brigham

Young (1801–77) ket binalakadanna dagiti kabsat a babbai a tumulongda kadagiti agkasapulan ken mangsursuro kadagiti paglaingan a mangpalugod kadakuada a mangtaripato wenno mangaywan kadagiti bagbagida. Kinunana, “Agsursurokayo a mangbiag kadagiti bagbagiyo; mangidulin kadagiti bukbukel ken arina, ket urnongen daytoy para iti aldaw ti kinakirang.”<sup>3</sup> Babaen ti panangiturong ti priesthood, agtultuloy ti Relief

Society a mangisuro maipapan iti panagpannurray iti bukod a kabaelan, tapno masalagniban ti familia, ken tapno maparegta ti bukod a kinalinteg ken dagiti aramid a panangngasi, ti natarnaw nga ayat ni Cristo.

#### **DAGITI NAGADAWAN**

1. Kitaen iti *Handbook 2: Administering the Church* (2010), 9.4.2.
2. Julie B. Beck, “The Welfare Responsibilities of the Relief Society President,” *Basic Principles of Welfare and Self-Reliance* [2009], 6.
3. *Teachings of Presidents of the Church: Brigham Young* (1997), 231.

**1.** Kasano a matulongak dagiti kabsat a babbai ken dagiti familiada tapno mapadur-asda ti temporal a panagpannurray iti bukod a kabaelan?

**2.** Kasano a mapadur-asko iti mismo a temporal a panagpannurrayko iti bukodko kabaelan?

Para iti ad-adu pay nga impormasion, mapan iti [www.reliefsociety.lds.org](http://www.reliefsociety.lds.org).